

KERATAN AKHBAR

TARIKH : 28 JUN 2023
AKHBAR : BERITA HARIAN
PAUTAN : <https://www.bharian.com.my/bisnes/lain-lain/2023/06/1120057/kerajaan-pastikan-gaji-pendapatan-rakyat-naik-secara-berkala>

Kerajaan pastikan gaji, pendapatan rakyat naik secara berkala



Rafizi pada sidang media mengenai IHP bagi Mei 2023 di Putrajaya, hari ini - NSTP/Mohd Fadli Hamzah

PUTRAJAYA: Kerajaan akan berusaha memastikan gaji dan pendapatan rakyat naik secara berkala, setimpal dengan kenaikan kos sara hidup, kata Menteri Ekonomi, Rafizi Ramli.

Beliau berkata, fokus kementeriannya ialah membangunkan kerangka Dasar Gaji Progresif bersama-sama Kementerian Sumber Manusia untuk memastikan pertumbuhan gaji yang lebih sekata dan inklusif.

Katanya, dengan pertumbuhan gaji yang lebih sekata dan inklusif, seterusnya mendorong kepada gaji dan pendapatan yang lebih baik kepada semua pekerja terutamanya golongan muda.

"Kertas dasar mengenai Dasar Gaji Progresif akan dibentangkan kepada Majlis Tindakan Ekonomi Negara (MTEN) pada Ogos ini untuk mendapat panduan dari kepimpinan negara.

"Ini adalah kali pertama dalam sejarah negara mana-mana pentadbiran mengusahakan satu kerangka dasar khusus mengenai pertumbuhan gaji yang sekata dan inklusif kepada semua pekerja," katanya pada sidang media mengenai Indeks Harga Pengguna (IHP) bagi Mei 2023 di sini, hari ini.

Rafizi berkata, fokus kepada pertumbuhan gaji juga akan menjadi tema utama perancangan ekonomi negara di bawah Rancangan Malaysia yang akan datang.

Beliau berkata, strategi itu dijangka akan membantu menangani kos sara hidup rakyat melalui penyelesaian kukuh yang berkekalan.